

Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line-p Kalaallit Nunaata iluani avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnersut. Misissuineq Inatsisartunut UPA 2023 nallertinnagu tunniunneqassaaq (Ineqarnermut Attaveqaasersuutinullu Naalakkersuisoq)

Akissuteqaat

(Ineqarnermut Attaveqaasersuutinullu Naalakkersuisoq)

Siullermeerneqarnera

Aallarniutigalugu periarfissaq manna iluatsillugu aalajangiiffigisassatut siunnersuummut matumunnga, inuiaqatigiisugut pilersorneqarnitsinnut tunngavilersorluakkamik isumaliutigilluakkamillu tunngaveqarluni ersarissumik ersersitsisumut qujavunga. Qanga periutsit attatiinnerneqarnissaannut pituttorsimanginnissatsinnik siunnersuuteqartup isumaanut, Naalakkersuisut tamakkiisumik isumaqataapput.

Siunnersuutigineqartutut misissuinissaq, ajornartorsiutaasup assigiinngisitaarnerusumik isiginiarneqarnissaanut Inatsisartunut periarfissiissaaq. Taamaalilluni nunatsinni pissutsinut naleqqussakkamik politikikkut aaqqiissutissarsiorsinnaalissaagut.

Taamaakkaluartoq nalorninartut ataasiakkaat eqqaaneqartariaqarput.

Misissuinissaq ukiumik ataatsimik sivissuseqassasoq naatsorsuutigineqartariaqarpoq. Misissuinissami tunngaviusussat piareersarneqarnissaannut pineqartumut attuummassutillit soqutigisaqatigiillu peqataatinneqarnissaannut periarfissiisoqartariaqarpoq. Tamatuma saniatigut isiginiarneqartussaavoq Royal Arctic Linemut assartuusinissamut isumaqatigiisummi akuersissummik peqarnerat tassanilu atavoq nunaqarfiit assigiiartumik ataqatigiisumik nassiussanik pilersorneqarnissaat.

Naalakkersuisuniit allannguutit innuttaasut nunaqarfinni najugaqaannarnissamik periarfissamik pinngitsoortitsinnaasutut kinguneqarsinnaasutut ajoqusiinnaasunut peqataasinnaanginnermut una iluatsillugu oqaatigiumavara. Taamaattumik nunaqarfinnut assartuisarnerup attatiinnerneqarnissaa misissuinissami eqqarsaatigineqassaaq.

Imaatigut assartuineq inuiaqatigiinni aalajangiisuuvoq, taamaattumillu imaatigut assartuinnermut tunngasunik aalajangiitinnata eqqarsarluartariaqarluta. Royal Arctic Linep akuersissutaata atorunnaarsinneqassappat iluaqutissat, ajoqutissallu misissorneqarnissaannik

siunnersuummut matumunnga tunngatillugu, eqqarsarluartariaqartugut Naalakkersuisut isumaqarput.

Taamaattumik Naalakkersuisut siunnersuut taperserpaat, misissuinissalli aallartinneqarnissaa sioqqullugu piareersartariaqarneq patsisaalluni siunnersuutigaarput, piffissaliusseq UPA2023-mit UKA2023-mut sivitsorneqassasoq.

Tamanna tunuliaqutaralugu tullituttooq allannguutissatut siunnersuutigineqarpoq:

”Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaata iluani avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnersut. Misissuineq Inatsisartunut UKA 2023 nallertinnagu tunniunneqassaaq.”